

CUMÜN DA VASCHINS DA SCUOL



Reglamaint Fondo Chasper Pinösch

REGLAMAIN**FONDO CHASPER PINÖSCH****Art. 1**

Fundamaint Il fundamaint dal "Fondo Chasper Pinösch" sun las disposiziuns d'ultima voluntà dal testader Chasper Pinösch missas in scrit in seis testamaint dals 1. schner 1912.

Art. 2

Intent Il "Fondo Chasper Pinösch" ha per mera d'impuonder ils fits respectivamaing il rechav dal chapital dal fuond per sustgnair a giuvenils d'amenduos schlattas cun contribuziuns als cuosts da lur giarsunadi, fuormaziun professiunala e scolaziun supplementaria obain da lur stüdi.

Premessa per surgnir ün tal sustegn finanziel es cha la persuna petenta possa far valair ün bsögn correspondent e ch'ella saja vaschina da Scuol ed abitanta da Ftan o d'Ardez.

Art. 3

Facultà Al "Fondo Chasper Pinösch" es gnü dedichà üna facultà iniziala da 100'000.00 francs svizzers. Quist chapital dal fuond nu das-cha ne gnir parti ne diminui. Per realisar l'intent dal fuond das-cha blerant gnir dovrats unicamaing ils fits respectivamaing il rechav dal chapital.

La facultà dal fuond ha da gnir administrada confuorm als princips commercials approvats. Scha'l chapital dal fuond dess gnir investi in titels da valor, lura ha il ris-ch da gnir reparti sün differentas categorias d'investiziun. Impustüt nu das-cha la facultà gnir periclitada tras transacziuns speculativas, ma ella nu sto esser plazzada cun sgürezza tutelara.

Art. 4

Organisaziun Il cussagl da vaschins dal cumün da vaschins da Scuol administrescha la facultà dal "Fondo Chasper Pinösch". Ad el suprastà da manar la contabilità dal fuond e d'executar las decisiuns da la cumischiun "Fondo Chasper Pinösch" cha quella nu tira in aigna cumpetenzza. La cumischiun "Fondo Chasper Pinösch" as cumpuona dal capo da

vaschins e da duos ulteriurs commembers dal cussagl da vaschins, ün da Ftan ed ün d'Ardez. Ella as constituischa sves.

Las cumpetenzas da la cumischiun "Fondo Chasper Pinösch" sun impustüt quellas:

- a) da decider davart dumondas da sustegn finanziel i'l rom da l'intent dal fuond;
- b) da decider davart l'investiziun dal chapital dal fuond;
- c) da reglar il dret da suottascripziun per las fatschendas bancarias dal fuond;
- d) da stabilir il quint annual dal fuond.

La cumischiun "Fondo Chasper Pinösch" es cumpetenta da tour decisius, schi sun preschaints almain duos commembers. Tuottas decisius vegnan tuttas in votaziun averta. Decisiva es la majorità da las vuschs. In cas da parità da vuschs ha il president da dar la vusch da tagl. Üna rapreschantanza nun es admissa. Davart las sezzüdas e decisius da la cumischiun ha da gnir manà ün protocol.

Sch'ingün dals trais commembers da la cumischiun "Fondo Chasper Pinösch" nu s'oppuona, pon singulas decisius excepziunalmang eir gnir tuttas sün via circulara.

Art. 5

Dumondas da sustegn

Dumondas da sustegn inoltradas a la cumischiun "Fondo Chasper Pinösch" han da gnir fattas da las personas petentas eventualmang cun l'approvaziun da lur rapreschantants legals. Per talas dumondas esa da far adöver dal formular uffical correspondent. A la dumonda da sustegn ha da gnir aggiunt la documainta necessaria per pudair güdichar correctamang davart sia güstificaziun.

La cumischiun "Fondo Chasper Pinösch" publichescha periodicamang seis avis per l'inoltraziun da dumondas da sustegn finanziel.

Las contribuziuns cha'l "Fondo Chasper Pinösch" offerischa dessan valair in general sco sustegn finanziel supplementari als stipendis pajats da vart dal chantun Grischun.

Art. 6

Revisiun

La revisiun dal quint annual dal "Fondo Chasper Pinösch" vain fatta da la cumischiun sindicatoria dal cumün da vaschins da Scuol insembel cun l'examinaziun dals affars da quints cumünals.

Art. 7

Entrada in vigur Il reglamaint "Fondo Chasper Pinösch" preschaint aintra in vigur al mumaint ch'el vain acceptà da la radunanza dals vaschins.

Cun l'entrada in vigur da quist reglamaint vegnan abolidas prescripziuns anteriuras in connex cul "Fondo Chasper Pinösch" chi stan in cuntradicziun cun las disposiziuns preschaintas.

Decis uschè da la radunanza da vaschins dal cumün da vaschins da Scuol dals 15 november 2016.

Il capo da vaschins:

L'actuar:



Jon Fadri Tönnett



Anton à Porta